

四庫全書

集部

欽定四庫全書

集部

御選歷代詩餘卷五十八

詳校官中書

臣

潘有為

侍讀臣孫球覆勘

總校官進士

臣

朱

鈴

校對官學政

臣

翁樹棠

謄錄監生

臣

劉

禮

欽定四庫全書

御選歷代詩餘卷五十八目錄

九十五字

水調歌頭

上

蘇舜欽

蘇軾

三首

葛勝仲

周紫芝

蔡伸

葉夢得
五首

趙師俠

趙長卿

李綱

曾覲

侯寘

辛棄疾
十三首

張孝祥
四首

韓元吉

朱熹

二首

崔與之

劉克莊

二首

王千秋

王炎

方岳

五首

馮取洽

王以寧

吳文英

覃懷高

蔡松年

王庭筠

趙秉文

段克己

二首

雷淵

元好問
三首

趙孟頫

羅慶

唐桂芳

李孝光

前調
又一體

蘇軾

賀鑄

毛滂二首

葛勝仲

葛郊三首

呂渭老

趙師俠

趙長卿

李綱四首

御選歷代詩餘卷五十八目錄

欽定四庫全書

御選歷代詩餘卷五十八

九十五字

司經局洗馬掌局事兼翰林院修撰加二級臣王奕清奉

旨校刊

水調歌頭

上

水調隋唐時曲名水調歌者一曲之名如稱河傳
曰水調河傳蜀王衍泛舟閬中亦自製水調銀漢
曲是也歌頭又曲之始音如六州歌頭氏州第一
之類姜夔填此詞名為花犯念奴吳文英名為江
南好皆此調也一名
凱歌雙調九十五字

水調歌頭

滄浪亭

蘇舜欽

瀟灑太湖岸，淡沱洞庭山。魚龍隱處，煙霧深鎖渺瀰間。
方念陶朱張翰，忽有扁舟急檣，浪載鱸還落。日暴風
雨歸路遶汀灣。丈夫志當景盛，耻踈閒。壯年何事憔悴
華髮，改朱顏。擬借寒潭垂釣，又恐相猜鷗鳥，不肯傍
青綸刺棹。穿蘆荻，無語看波瀾。

前調

和別子由

蘇軾

安石在東海，從事鬢驚秋。中年親友難別，絲竹緩離愁。

一旦功成名遂準擬東還海道扶病入西州雅志因軒
冕遺恨寄滄洲 歲云暮須早計要褐裘故鄉歸去千
里佳處輒遲留我醉歌時君和醉倒君須扶我惟酒可
忘憂一任劉玄德相對臥高樓

前調

遺章質夫家
善琵琶者

蘇軾

昵昵兒女語燈火夜微明恩冤爾汝來去彈指淚和聲
忽變軒昂勇士一鼓填然作氣千里不留行回首暮雲
遠飛絮攪青冥 衆禽裏真彩鳳獨不鳴躋攀寸步千

險一落百尋輕煩子指間風雨置我腸中冰炭起坐不能平推手從歸去無淚與君傾

前調

子由徐州中秋作

蘇軾

離別一何久七度過中秋去年東武今夕明月不勝愁
豈憶彭城山下同泛清河古汴船上載涼州鼓吹助清
賞鴻鴈起汀洲坐中客翠羽帔紫綺裘素娥無賴西
去曾不為人留今夜清尊對客明夜孤帆水驛依舊照
離憂但恐同王粲相對永登樓

前調

泛舟

葛勝仲

夜泛南溪月光影冷涵空棹飛穿碎金電翻動水精宮
橫管何妨三弄重醕仍須一斗知費幾青銅坐久桂花
落襟袖覺香濃庾公閣子猷舫興應同從來好景良
夜我輩最情鍾但恐仙娥以後嫌我塵容俗狀清境不
相容擊汰同情賞賴有紫溪翁

前調

登白鷺亭

周紫芝

歲晚念行役江闊渺風煙六朝文物何在回首更淒然

倚盡危樓傑觀暗想瓊枝璧月羅韞步承蓮桃葉山前
鷺無語下寒灘潮寂寞浸孤壘漲平川莫愁艇子何
處煙樹杳無邊王謝堂前雙燕空繞烏衣門巷斜日草
連天只有臺城月千古照嬋娟

前調

蔡伸

相逢非草草分袂太匆匆征裘淚痕浥徧眸子怯酸風
天際孤帆難駐柳外香輶望斷雲雨各西東回首重城
遠樓觀暮煙中黯銷魂思陳事已成空東郊勝賞歸

路騎馬踏殘紅月下一尊芳酒凭檻清歌幾曲別後少
人同為問桃花面一笑為誰容

前調

湖光亭落成

葉夢得

修眉埽遥碧清鏡走回流堤外柳煙深淺碧瓦起朱樓
分付平雲千里包卷騷人遺思春色入簾鉤桃李盡無
語波影動蘭舟 念謝公平生志在滄洲登臨漫懷風
景佳處每難酬却歎從來賢士如我與公多矣名迹竟
誰留惟有尊前醉何必問消憂

前調 中秋

葉夢得

河漢下平野香霧捲西風倚空千嶂橫起銀闕正當中
常恨年年此夜醉倒歌呼誰和何事與君同莫恨歲華
晚容易感梧桐攬清影君試與問天公遙知玉斧初
斲重到廣寒宮付與孤光千里不遣微雲點綴為我洗
長空老去狂猶在應未笑衰翁

前調

九月望日與
客習射西園

葉夢得

霜降碧天靜秋事促西風寒聲隱地初聽中夜入梧桐

起瞰高城回望寥落關河千里一醉與君同疊鼓開清
曉飛騎引離弓歲將晚客爭笑問衰翁平生豪氣安
在走馬為誰雄何似當筵虎士揮手弦聲響處雙鴈落
遙空老矣真堪媿回首望雲中

前調

濠州觀
魚臺作

葉夢得

渺渺楚天闊秋水去無窮兩涯不辨牛馬輕浪舞回風
猶倚高樓一笑圍圍遊魚來往還戲此波中危檻對千
里落日照晴空子非我安知我意真同鵬飛鷗化何

有滄海漫沖融堪笑磻溪遺老白首直鉤溪畔歲晚忽
衰翁功業竟安在徒自兆非熊

前調

葉夢得

江海渺千里飄蕩歎流年等閒足馬相過乘興却翛然
十載悲歡如夢撫掌驚呼相語往事盡飛煙此會真難
偶此醉且留連酒方半誰輕便動離絃我歌未闕公
去明日復山川空有高城危檻縹緲當筵清唱餘響落
尊前細雨黃花後飛鴈點遙天

前調

煙雨
觀

趙師俠

江流清淺外山色有無中
平田坡岸迴曲一目望難窮
波面輕鷗容與沙際野航橫
渡不信畫圖工路入神仙宅
翠鎖梵王宮俯晴郊增勝槩
氣橫空雲林城市層列知有
幾重重更上危亭高處徙倚
闌干虛敞象緯逼璇穹要盡
無邊景煙雨看空濛

前調

元日客
寧都

趙長卿

離愁晚如織托酒與消磨
奈何酒薄愁重越醉越愁多

忍對碧天好夜皓月流光無際光影轉庭柯有恨空垂
淚無語但悲歌 因凝想從別後促雙蛾春來底事辜
負紫袖與紅鞵速整離鞍歸去著意淺斟低唱細看小
婆婆萬蕊千花裏一任玉顏酡

前調

李 綱

物我本虛幻世事若俳諧功名富貴當得須是箇般才
幸有山林雲水造物端如有意分付與吾儕寄語舊猿
鶴不用苦相猜 醉中適一杯盡復一杯坐間有客超

詣言笑可忘懷況是清風明月如會幽人高意千里自
飛來共笑陶彭澤空對菊花開

前調

和南劍
薛倅

曾覲

長樂富山水杖屨足追遊故人千里西望雙劍黯迴眸
多謝扁舟乘興慰我天涯羈思何必羨封侯暮雨疎簾
捲爽氣颯如秋送征鴻浮大白倚危樓參橫月落耿
耿河漢近人流堪歎人生離合後日征鞍西去別語却
從頭老矣江邊路清興漫悠悠

前調

上饒送程伯禹尚書

侯寘

涼吹送溪雨落日散汀鷗暮天空闊無際層巘綠蛾浮
上印初辭藩寄拂袖欣還故里歸騎及中秋倚杖飽山
閣回首翠微樓一區宅千里客舊從遊甘棠空有餘
蔭誰解挽公留翰墨文章獨步富貴功名餘事當代仰
風流暫蠟登山屐終作濟川舟

前調

辛棄疾

我飲不須勸正怕酒尊空別離亦復何恨此別恨匆匆

頭上貂蟬貴客花外麒麟高塚人世竟誰雄一笑出門
去千里落花風 孫劉輩能使我我不為公余髮種種如
是此事付渠儂但得平生湖海除了醉吟風月此外百
無功毫髮皆帝力更乞鑑湖東

前調

盟鷗

辛棄疾

帶湖吾甚愛千丈翠匳開先生杖履無事一日走千回
凡我同盟鷗鷺今日既盟之後來往莫相猜白鶴在何
處嘗試與偕來 破青萍排翠藻立蒼苔窺魚笑汝癡

計不鮮舉吾杯廢沼荒丘疇昔明月清風此夜人世幾
歡哀東岸綠陰少楊柳便須栽

前調

謝湯朝
美司諫

辛棄疾

白日射金闕虎豹九關開見君諫疏頻上談笑挽天回
千古忠肝義膽萬里蠻煙瘴雨往事莫驚猜政恐不免
耳消息日邊來笑吾廬門掩草徑封苔未應兩手無
用要把蟹螯杯說劍論詩餘事醉舞狂歌欲倒老子頗
堪衰白髮寧有種一一醒時栽

前調

和王政之
吳江觀雪

辛棄疾

造物故豪縱，千里玉鸞飛。等閒更把萬斛瓊粉，蓋玻瓈。
好卷垂虹千丈，只放冰壺一色。雲海路應迷。老子舊遊處，
回首夢耶非。謫仙人，鷗鳥伴，兩忘機。掀髯把酒一笑，詩在
片帆西。寄語煙波舊侶，聞道蓴鱸正美，休裂芰荷衣。上界足
官府，汗漫與君期。

前調

九日遊
雲洞

辛棄疾

今日復何日，黃菊為誰開。淵明漫愛重九，曾次正崔嵬。

酒亦關人何事政自不能不爾誰遣白衣來醉把西風
扇隨處障塵埃為公飲須一日三百杯此心高處東
望雲氣見蓬萊翳鳳驂鸞公去落佩倒冠吾事抱病且
登臺歸路踏明月人影共徘徊

前調

題張晉英
玉峰樓

辛棄疾

木末翠樓出詩眼巧安排天公一夜削出四面玉崔嵬
疇昔此山安在應為先生見晚萬馬一時來白鳥飛不
盡却帶夕陽回勸君飲左手蟹右手杯人間萬事變

滅今古幾池臺君看莊生達者猶對山林舉壤哀樂未
忘懷我老尚能賦風月試追陪

前調

辛棄疾

四坐且勿語聽我醉中吟池塘春草未歇高樹變鳴禽
鴻鴈初飛江上蟋蟀還來牀下時序百年心誰要卿料
理山水有清音歡多少歌長短酒淺深而今已不如
昔後定不如今閒處直須行樂良夜更教秉燭高會惜
分陰白髮短如許黃菊倩誰簪

前調

賦傳巖史
悠然閣

辛棄疾

歲歲有黃菊千載一東籬悠然政須兩字長笑退之詩
自古此山元有何事當時纔見此意有誰知君起更斟
酒我醉不須辭回首處雲正出鳥倦飛重來樓上一
句端的與君期都把軒牕寫徧更使兒童誦得歸去來
今辭萬卷有時用植杖且耘耔

前調

三山被召陳
端仁飲餞

辛棄疾

長恨復長恨裁作短歌行何人為我楚舞聽我楚狂聲

余既滋蘭九畹又樹蕙之百畝秋菊更餐英門外滄浪
水可以濯吾纓一杯酒問何似身後名人間萬事毫
髮常重泰山輕悲莫悲生離別樂莫樂新相識兒女古
今情富貴非吾事歸與白鷗盟

前調

辛棄疾

折盡武昌柳挂席上瀟湘二年魚鳥江上笑我往來忙
富貴何時休問離別中年堪恨憔悴鬢成霜絲竹陶寫
耳急羽且飛觴序蘭亭歌赤壁繡衣香使君千騎鼓

吹風采漢侯王莫把離歌頻唱可惜南樓佳處風月已
淒涼在家貧亦好此語試平章

前調

送信守
王桂發

辛棄疾

酒罷且勿起重挽使君鬚一身都是和氣別去意何如
我輩情鍾休問父老田頭說伊淚落獨憐渠秋水見毛
髮千尺定無魚望青闕左黃閣右紫樞東風桃李陌
上下馬拜除書屈指吾生餘幾多病妨人痛飲此事正
愁余江湖有歸鴈能寄草堂無

前調

送鄭厚卿
赴衡州

辛棄疾

寒食不少住千騎擁春衫衡陽石鼓城下記我舊停驂
襟以瀟湘桂嶺帶以洞庭青草紫蓋屹西南文字起騷
雅刀劒化新蠶看使君於此事定不凡奮髯抵几堂
上尊俎自高談莫信君門萬里但使民歌五袴歸詔鳳
凰銜君去我誰飲明月影成三

前調

舟次
揚州

辛棄疾

落日暗塵起邊馬獵清秋漢家組練十萬列艦聳層樓

誰道投鞭飛渡憶昔鳴鏑血汚風雨佛狸愁季子正年
少匹馬黑貂裘今老矣搔白首過揚州倦遊欲去江
上手種橘千頭二客東南名勝萬卷詩書事業嘗試與
君謀莫射南山虎直覓富民侯

前調

隱靜寺
觀雨

張孝祥

青嶂度雲氣幽壑舞回風江神助我雄觀喚起碧霄龍
電掣金蛇千丈雷震靈囂萬疊洶洶欲崩空盡瀉銀潢
水散入寶蓮宮坐中客凌積翠看莽洪人間應失七

筋惟我獨從容淨洗從來塵垢潤及無邊枯槁造物不言功天宇忽開霽日在五雲東

前調

汪德邵無
盡藏樓

張孝祥

淮楚襟帶地雲夢澤南州滄江翠壁佳處突兀起紅樓
憑仗使君胸次為問仙翁何在長嘯俯清秋試遣吹簫
看騎鶴恐來遊欲乘風凌萬頃泛扁舟山高月小霜
降凜凜不能留一弔周郎羽扇尚想曹公橫槊興廢兩
悠悠此意無盡藏分付水東流

前調

桂林中秋

張孝祥

今夕復何夕此地過中秋賞心亭上喚客追憶去年遊
千里江山如畫萬井笙歌不夜狹路看黿頭玉界湧銀
闕珠箔捲瓊鈎馭風去忽吹到嶺南州去年明月依
舊還照我登樓樓下水明沙淨樓外參橫斗轉搔首思
悠悠老子興不淺聊復少淹留

前調

過瀟湘寺

張孝祥

濯足夜灘急晞髮北風涼吳山楚澤行盡只欠到瀟湘

買得扁舟歸去此事天公付我六月下滄浪蟬蛻塵埃
外蝶夢水雲鄉製荷衣紉蘭佩把萍房湘妃起舞一
笑撫瑟奏清商喚起九歌忠憤拂拭三閭文字還與日
爭光莫遣兒輩覺此樂未渠央

前調

九日次辛
稼軒韻

韓元吉

今日俄重九莫負菊花開試尋高處攜手躡屐上崔嵬
放目蒼崖萬仞雲護曉霜成陣知我與君來古寺倚修
竹飛檻絕塵埃笑談間風滿座酒盈杯仙人跨海休

問隨處是蓬萊落日平園西望鼓角秋聲悲壯戲馬但
荒臺細把茱萸看一醉且徘徊

前韻

次素機
仲韻

朱熹

長記與君別丹鳳九重城歸來故里愁思悵望渺難平
今夕不知何夕得共寒潭煙艇一笑俯空明有酒徑須
醉無事莫關情 尋梅去疎竹外一枝橫與君吟風弄
月端不負平生何處車塵不到有箇江天如許爭肯換
浮名只恐買山隱却要鍊丹成

前調

朱熹

江水浸雲影。鴻鴈欲南飛。攜壺結客，何處空翠渺煙霏。
塵世難逢一笑，況有紫萸黃菊，堪插滿頭歸。風景今朝
是，身世昔人非。
酬佳節，須酩酊，莫相違。人生如寄何
事，辛苦怨斜暉。無盡今來古往，多少春花秋月，那更有
危機。與問牛山客，何必淚沾衣。

前調

崔與之

萬里雲間戍，立馬劔門關。亂山極目無際，直北是長安。

莫苦當年塗炭漸靖遠疆鋒鏑天道久應還手寫留屯
奏炯炯寸心丹 對青燈搔白髮漏聲殘老來勲業未
就妨却一身閒梅嶺綠陰青子蒲澗清泉白石怪我舊
盟寒烽火平安夜歸夢到家山

前調

遊蒲澗迢和
崔菊坡韻

劉克莊

敕使竟空返公不出梅關當年玉座記憶側席問平安
羽扇尉佗城上野服仙遊閣下遼鶴幾時還賴有蜀耆
舊健筆與書丹 青油士珠履客各彫殘四方感感靡

騁獨此尚寬閒丞相祠堂何處太傅石碑墮淚木老瀑
泉寒往者不可作置酒且登山

前調

和菊
坡韻

劉克莊

落日幾呼渡佳夕每留闕有時來照清淺鬢雪似潘安
一曲親蒙君賜兩岸更無人跡惟見鷺飛還隙地欠栽
接蕉荔雜黃丹柳全疎松尚幼怕摧殘旁人笑我癡
計管鑰費防閑翁意在乎林壑客亦知夫水月滿腹貯
清寒賦咏差有媿赤壁與滁山

前調 九日

王千秋

壯日遇重九躍馬恣歡遊如今何事多感霜鬢不禁秋
目斷五陵臺路無復登高千騎鼓吹簇輕裘霜露下南
國淮漢遶神州釣松鱸斟郢酒聽吳謳壯心鑠盡今
夕重見紫茱羞月落笳鳴沙磧烽靜人耕榆塞此志恐
悠悠擬欲墮清淚生怕菊花愁

前調

夜泛
湘江

王炎

江月冷如水江水碧於空晚來一霎過雨為我洗秋容

悄悄四山人靜凜凜三更露下天闊叫孤鴻喚醒蓬牕
夢身在水晶宮 捐湘妃招月姊御清風素琴韻遠不
覺醉眼杏花紅禹穴騎鯨仙去東海釣鰲人遠此意與
誰同倚枕一長嘯幽壑舞魚龍

前調

九日
醉中

方岳

左手紫螯蟹右手綠螺杯古今多少遺恨俯仰已塵埃
不共青山一笑不與黃花一醉懷抱向誰開舉酒屬吾
子此興正崔嵬 夜何其秋老矣盍歸來試問先生歸

否茅屋欲生苔窮則簞瓢陋巷達則鼎爨清廟吾意兩
悠哉寄語雪溪外鷗鷺莫驚猜

前調

平山堂用
東坡韻

方岳

秋雨一何碧山色倚晴空江南江北愁思分付酒螺紅
蘆葉蓬舟千里菰菜蓴羹一夢無語寄歸鴻醉眼渺河
洛遺恨夕陽中蘋洲外山欲暝斂眉峰人間俯仰陳
迹歎息兩仙翁不見當時楊柳只是從前煙雨磨滅幾
英雄天地一孤嘯匹馬又西風

前調

九日多景樓

方岳

醉我一壺玉了此十分秋江濤還似當日擊楫渡中流
問訊重陽煙雨俯仰人間今古此意渺滄洲天地幾今
夕舉白與君浮舊黃花新白髮笑重遊滿船明月猶
在何日大刀頭誰跨揚州鶴去已怨故山猿老借箸欲
前籌莫倚闌干北天際是神州

前調

壽趙文昌

方岳

剡曲一篷月乘興到人間蓬萊山在何處鶴骨不禁寒

胸有雲門禹穴筆有禊亭晉帖風露洗脾肝秋入紫宸
殿磨玉寫琅玕問何如趨瑣闥繫狔鞍江濤今已如
此可奈寸心丹我宋與天無極公等如春難老王氣自
龍蟠勲業付浯石留與世人看

前調

別廬山題
龍湖閣

方岳

宇宙一杯酒暝色倚重湖青山杳杳何處煙水渺愁予
別岸風濤噴薄半夜魚龍悲嘯能撼我詩無李白醉不
醒喚起問何如是耶非天莽蒼雪模糊蒼顏白髮如

此空復笑今吾寄語鷺朋鷗侶好在風餐水宿底處不
煙蕪吾亦從此逝從我者誰歟

前調

社後三日
邀登北山

馮取洽

雪霽春已半露重午方暄一筇挂上高絕便覺眼前寬
指點數家樓閣檢校一川花柳綠水接青煙巒岫競圍
遶風日更清妍 閑媒蜂紛使蝶菜花繁少年正爾行
樂誰復顧華顛自有此丘此坂那得遊人簫鼓暖響出
中天歸步不妨晚恰則月初弦

前調

裴公亭懷古

王以寧

歲歲橘洲上老葉舞愁紅
西山光翠依舊影落酒杯中
人在子亭高處下望長沙城
郭獵獵酒帘風遠水湛寒
碧獨釣綠蓑翁
懷往事追昨夢轉頭空
孫郎前日豪健頤指五都雄
起擁奇才劒客十萬銀戈赤
幘歌鼓壯軍容何似裴相國
談道老圭峰

前調

賦方泉望湖樓

吳文英

屋下半流水屋上幾青山
賞心千里明鏡入座玉光寒

雲起南峰未雨雲歛北峰初
霽健筆寫青天俯瞰古城
堞不礙小闌干繡鞍馬
輭紅路乍回班層梯影轉亭
午信手展絃編殘照遊船收
盡新月畫簾纔卷人在翠
壺間天際笛聲起塵世夜漫漫

前調

遊武夷

覃懷高

翠甍插雲表初意隔仙凡
臨風據案一見邂逅似開顏
幾欲拏舟九曲便擬捫參絕
頂直下俯塵寰聊此稅吾
駕贏得片時間問仙人緣
底事去不還長風浩浩何

許清夢杳難攀只有蒼煙古木好在清湍白石依舊畫
圖間回首武夷路杳靄沒雲驂

前調

蔡松年

雲間貴公子玉骨秀橫秋十年流落冰雪香靄紫貂裘
燈火春城咫尺曉夢梅花消息蠟紙寫銀鈎老矣黃塵
眼如對白蘋洲世間物惟有酒可忘憂蕭閒一段歸
計佳處著君侯翠竹江村月上但要綸巾鶴氅來往亦
風流醉墨薔薇露灑偏酒家樓

前調

王庭筠

秋風禿林葉却與鬢生華十年長短亭裏落日冷邊笳
飛鴈白雲千里況是登山臨水無賴客思家獨鶴歸何
晚已復滿林鴉望蓬山雲海闊浩無涯安期玉舄何
處袖有棗如瓜一笑那知許事且看尊前故態耳熱眼
生花肝肺出芒角漱墨作枯槎

前調

趙秉文

四明有狂客呼我謫仙人俗緣千劫不盡回首落紅塵

我欲騎鯨歸去只恐神仙官府嫌我醉時嗔笑拍羣仙
手幾度夢中身倚長松聊拂石坐看雲忽然黑霓落
手醉舞紫毫春寄語滄浪流水曾識閒閒居士好為濯
冠巾却返天台去華髮散麒麟

前調

段克己

清秋好天氣禾黍已登場羣心思答神貺吉日復辰良
神既來兮庭宇颯颯西風吹雨仙仗儼長廊巫覡傳神
語出戶舞僊僊剗肥羜瀝桂酒奠椒漿一年好處須

記此樂最難忘風外淵淵簫鼓醉飽滿城黎庶顛倒臥
康莊夜久羣動息風散一簾香

前調

段克己

雙龍隱扶輦千騎縱翱翔雲旌翠蕤摩蕩遙指白雲鄉
風馭飄飄高舉雲駕攀留無處煙霧杳茫茫小立西風
外似聽珮鏘鏘暮天長秋水闊遠山蒼歸途正踏明
月醉語說豐穰但願明年田野更比今年多稼神貺詎
能忘君可多醺酒吾復有新章

前調

元好問李獻能游玉華谷少
姨祠於壁間得漢末田疇詩

雷淵

雲山有宮闕浩蕩玉華秋何年驚鷺同侶清夢入真遊
細看詩中元鼎似道區區東井冠帶事崑丘壞壁浣風
雨醉墨失蛟虬問詩仙緣底事媿幽州知音定在何
許此語為誰留世外青天明月世上紅塵白日我亦厭
鶯湫一笑拂衣去崧頂坐垂鈎

前調

元好問

山家釀初熟取醉不論錢清溪留飲三日魚鳥亦欣然

見說玉華詩老袖有忘憂萱草牛背穩於船鐵笛久埋
沒雅曲竟誰傳坐蒼苔敲亂石耿無眠長松夜半悲
嘯笙鶴下遙天天上金堂玉室地下石城瓊壁別有一
山川把酒問明月今夕是何年

前調

元好問

灘聲蕩高壁秋氣靜雲林回頭洛陽城闕塵土一何深
前日神光牛背今日春風馬耳因見古人心一笑青山
底未受二毛侵問龍門何所似似山陰平生夢想佳

處留眼更登臨我有一卮芳酒喚取山花山鳥伴我醉
時吟何必絲與竹山水有清音

前調

元好問

空濛玉華晚瀟灑古淙秋嵩高大有佳處元在玉溪頭
翠壁丹霞千丈古木寒藤兩岸村落帶林丘今日好風
色可以放吾舟 百年來算惟有此翁遊山川邂逅佳
客猿鳥亦相留父老雞豚鄉社兒女籃輿竹几來往亦
風流萬事已華髮吾道付滄洲

前調

和張大經
盆荷

趙孟頫

江湖渺何許歸興浩無邊忽聞數聲水調念我意悠然
莫笑盆池咫尺移得風煙萬頃來傍小牕前稀疏淡紅
翠特地向人妍華峰頭花十丈藕如船那知此中佳
趣別是一壺天倒挽翠甯醺酒醉臥碧雲深處雲影自
田田夢中呼一葉散後看書眠

前調

羅慶

雨晴山潑翠波淨水拖藍閒來共陪杖屨邂逅已成三

齒齒清泉白石步步碧桃翠竹是處輒幽探行到釣臺
下怪樹蔭空潭 踏芳洲尋別館履巉巖壺天日月長
在雲氣滿東南沽得一尊濁酒喚取山花谿鳥聽我醉
中談異日再過此端為解征驂

前調

唐桂芳

武夸最佳處晴氣碧於藍遠瞻崖壑溪曲六六與三三
莫問塵生滄海休歎鶴歸華表好景且容探鐵笛破龍
睡黑雨滿深潭 笑神仙留蛻骨閑空巖幾人蹭蹬不

遇太史滯周南最好擅場老子筆底文章如許何必事
清談暫憩桃花下白馬稅飛驂

前調

李孝光

東湖浸南麓北蕩帶西山其中大有佳處元不減商顏
上有鴈峰千疊下有龍灘百曲別是一人寰昨夜雨新
過流水到花間 一張琴一壺酒伴渠閒詩成真宰應
如萬象入嘲訕北海尊壘依舊東里杖藜無恙未放鬢
毛斑吾亦秣吾馬不怕路盤盤

前調

又一體
快哉亭

蘇軾

落日繡簾捲亭下水連空知君為我新作牕戶濕青紅
長記平山堂上欹枕江南煙雨杳杳沒孤鴻認得醉翁
語山色有無中一千頃都鏡淨倒碧峰忽然浪起掀
舞一葉白頭翁堪笑蘭臺公子未解莊生天籟剛道有
雌雄一點浩然氣千里快哉風

前調

賀鑄

南國本瀟灑六代寢豪奢臺城遊冶襍牋能賦屬宮娃

雲觀登臨清夏壁月留連長夜吟醉送年華回首飛鴛
瓦却羨井中蛙訪烏衣成白社不容車舊時王謝堂
前雙燕過誰家樓外河橫斗挂淮上潮平霜下檣影落
寒沙商女蓬牕猶唱後庭花

前調

擬饒州法
曹椽作

毛滂

金馬空故事方朔謾多端三千牘在玉殿何日賜清閒
難戀長安鐘漏誰借青雲咳唾拂袖且東還笑殺長纓
使復轉去秦關吾道在雖不遇面何慚雒陽年少高

論難與絳侯談富貴暫饒先手晞盡草頭秋露掩鼻出
東山且飽鯨魚膾風月過江南

前調

衢州雙石
堂呈孫守

毛滂

謝安涵雅量叔夜賦剛腸清宵假寐應笑長孺臥淮陽
盡徹東平屏障不廢南樓談詠宴寢自凝香庭下一坏
土須避赤帷裳雙石健舍古色照新堂百年喬木陰
下僵立兩蛟蒼目送千山爽氣簾捲一城風月杖屨合
徜徉他日峨眉秀相隔望明光

前調

葛勝仲

下瀨驚船駛揮塵恐尊空誰吹尺八寥亮嚼徵更含宮
坐愛金波潋灩影落蒲萄漲綠夜漏儘移銅回棹攜紅
袖一水帶香濃座中客馳雋辨語無同青鞵黃帽此
樂誰肯換千鍾巖壑從來無主風月故應長在賞不待
先容羽化尋煙客家有左仙翁

前調

送唯齋回
舟松江

葛郊

年來慣行役楚尾又吳頭餐霞吸露何事佳處輒遲留

雲聽漁舟夜唱花落牧童橫笛占盡五湖秋據牀興不
淺人在庾公樓 繡簾卷曲闌暝翠隸愁森羅萬象與
渠詩裏一時收天設四時風月地會三州山水邀我伴
浮鷗明朝起歸夢一枕過蘋洲

前調

回舟烏戌
值雨復晴

葛 郊

帆腹飽天際樹髮渺雲頭翠光千頃為誰來去為誰留
疑是吳宮西子淡掃修眉一抹妝罷玉匣秋中流送行
客卻立望層樓 風色變堤草亂浪花愁跳珠翻沫轟

雷掣電幾時收應是陽侯薄相催我胸中錦繡清唱和
盟鷗殘霞似相貸一縷媚汀洲

前調

葛 郊

青銅昏水面烏帽裏山頭風濤如此天公作意巧相留
常記垂虹晚渡臥看菰蒲煙雨屈指十三秋恍若華胥
夢無語下西樓翠翻空寒入座不禁愁五絃彈盡隱
隱天末暮虹收欲伴溪翁釣艇欵乃一聲江上寒碧點
輕鷗無人阻歸興直欲邁長洲

前調

呂渭老

詩人翻水盡寂寞五侯煙醉魂何在應騎箕尾列青天
記得平生談笑夾岸手栽楊柳同泛夜深船溪水還依
舊深淺半青竿小神仙殷七七許閒閒黃粱未熟經
遊都在夢魂間我厭囂塵濁味幾欲凌雲羽化雞犬不
留殘俗事丹砂冷且抱一枝安

前調

春野亭
送別

趙師俠

江亭送行客腸斷木蘭舟水高風快滿目煙樹織成愁

咿軋數聲柔櫓拍塞一懷離恨拍顧隔汀洲獨立蒼茫
外欲去強遲留海山長雲水闊思難收小亭深院歌
笑不忍記同遊惟有當時明月千里有情還共後會尚
悠悠此恨無重數和淚付東流

前調

中秋

趙長卿

今夕知何夕秋色正平分姮娥此際底事越樣好精神
已是天高氣肅那更清風灑灑萬里沒纖雲把酒臨風
飲酒面起紅鱗歌一曲舞一曲捧金尊從他妄想老

免顛顛正紛紛我為桂花擗醉明日扶頭不起顛倒白
綸巾天欲知人意夜雨莫傾盆

前調

同德久諸
季小飲

李

綱

律呂自相召韶濩不難諧致君澤物古來何世不須才
幸可山林高臥袖手何妨閒處醇酒醉朋儕千里故人
駕不怕物情猜 秋夜永更秉燭且銜杯五年離索誰
謂談笑豁幽懷況我早衰多病屏跡雲山深處俗客不
曾來此日埽花徑蓬戶為君開

前調

李綱

如意始身退此事古難諧中年醉飲多病閒去正當才
長愛蘭亭公子弋釣溪山娛適甘旨及朋儕衰疾臥江
海鷗鳥莫驚猜酒初熟招我友共一杯碧天雲捲高
掛明月照人懷我醉欲眠君去醉醒君如有意依舊抱
琴來尚有一壺酒當復為君開

前調

李綱

花徑不曾埽蓬戶為君開元戎小隊清曉佳客與同來

我為新來多瘦且恁澆花藝藥隨分葺池臺多謝故人
意迂訪白雲隈 暮春月修楔事會蘭齋一觴一詠何
媿當日暢幽懷況是茂林修竹映帶清流激湍山色碧
崔嵬勿復歎陳迹且為醉金杯


前調

和李似之
橫山對月

李綱

秋杪暑方退清若玉壺冰高樓對月天上宮殿不曾扃
散下淒然風露影照江山如畫渾覺俗緣輕弋者欲何
慕鴻羽正冥冥 世間法惟此事最堪憑太虛心量聊

假梨棗制頽齡但使心安身健靜看草根泉際吟蚓與
飛螢一坐小千劫無念契無生



御選歷代詩餘卷五十八

欽定四庫全書

集部

御選歷代詩餘卷五十九

詳校官中書臣潘有為

侍讀臣孫球覆勘

總校官進士臣

朱鈐

校對官學政臣

翁樹棠

謄錄監生臣

劉禮

欽定四庫全書

御選歷代詩餘卷五十九目錄

九十五字

水調歌頭

下

李綱

張元幹

四首

曾覲

侯寘

辛棄疾

范成大
二首

陳三聘

張孝祥
二首

仲并

袁去華

李處全

趙彥端

陸游

劉過

楊炎
二首

劉光祖

李泳

毛玘

韓澂
五首

汪莘
二首

吳潛

李昴英 二首

盧炳 二首

石孝友

林正大 四首

葛長庚

吳子孝

楊慎

前調 又一體

蘇軾

黃庭堅

呂渭老

向子諲

蔡伸

羅願

八聲甘州

湯恢

前調又一體

蕭列

鳳凰臺上憶吹簫

李清照

趙文

張翥

馬洪

天香 又一體

王觀

玉女迎春慢

彭元遜

傾杯樂

又一體

柳永

夢揚州

秦觀

尾犯

又一體

柳永

白雪 又一體

楊无咎

雙瑞蓮

趙以夫

慶清朝慢

文徵明

塞姑 又一體

柳永

小聖樂

元好問

芭蕉雨

晏璧

玉梅香慢

無名氏

徵招

又一體

趙以夫

周密

張炎
二首

聲聲慢

周密

璫瓏四犯

劉基

御選歷代詩餘卷五十九目錄

欽定四庫全書

御選歷代詩餘卷五十九

九十五字

詞經局洗馬掌局事兼翰林院修撰加二級臣王奕清奉

旨校刊

水調歌頭

下

水調歌頭

李太白
畫像

李
綱

太白乃吾祖逸氣薄青雲開元有道聊復乘興一來賓
天子呼來方醉灑面清泉微醒餘吐濕龍巾詞翰不加

點歌闕滿宮春 筆風雨心錦繡極清新大兒中令神
契兼有坐忘人不識將軍高貴醉裏指汙吾足乃敢尚
呵嗔千載已仙去圖像聳風神

前調

虎丘
中秋

張元幹

萬里冰輪滿千丈玉盤浮廣寒宮殿西望湖海冷光流
埽盡長空纖翳散亂疎林清影風露迫人愁徐步行歌
去危坐不眠休 問孤蓬緣底事苦淹留倦遊回首向
來雲臥兩星周此夜此生長好明月明年何處歸興在

南州老境一僖父異縣四中秋

前調

張元幹

今夕定何夕秋水滿東甌悲涼懷抱何事還倍去年愁
萬里碧空如洗寒浸十分明月簾捲玉波流非是經年
別一歲兩中秋坐中庭風露下冷颼颼素娥無語相
對尊酒且遲留琴罷不堪幽怨遙想三山影外人倚夜
深樓矯首望霄漢雲海路悠悠

前調

丁丑春登
垂虹亭

張元幹

拄策松江上舉酒酌三高此生飄蕩往來身世兩徒勞
長羨五湖煙艇好是秋風鱸膾笠澤久蓬蒿想像英靈
在千古傲雲濤俯滄波吞空曠恍神交解衣盤薄政
須一笑屬吾曹洗盡人間塵土埽去胸中冰炭痛飲讀
離騷縱有垂天翼何用釣連鰲

前調

張元幹

放浪形骸外憔悴山澤癯倒冠落佩此心不待白髭鬚
聊復脫身鷁鷺未暇先尋水竹矯首漢庭疏長夏噉丹

荔兩紀傲閒居 忽風飄連雨打向西湖藕花深處尚
能同載麴生無聽子談天舌本澆我書空曾次醉臥踏
冰壺畢竟凌煙像何似輞川圖

前調

曾覲

溪山多勝事詩酒辦清游主人為我增葺臺榭足凝眸
歸歸玉壺天地隱見瀛洲風月千首傲王侯誰與共登
眺公子氣橫秋 記當年曾共醉庾公樓一杯此際重
話前事逐風流多謝兼金清唱更擬重陽佳節按菊任

扶頭但願身長健浮世撩悠悠

前調

題岳麓
法華臺

侯寘

曉霧散晴渚秋色滿湘山青鞵黃帽忻與名士共躋攀
窈窕深林幽谷詰曲危亭飛觀俛首視塵寰長嘯望天
末餘響下雲端白鶴去荒井在汲清寒醒然毛骨浮
丘招我御風還拂拭蒼崖苔蘚一寫胸中豪氣渺渺洞
庭寬山鬼善呵護千載照層巒

前調

辛棄疾

萬事到白髮日月幾西東羊腸九折岐路老我慣經從
竹樹前溪風月雞酒東家父老一笑偶相逢此樂竟誰
覺天外有冥鴻味平生公與我定無同玉堂金馬自
有佳處著詩翁好鎖雲煙牕戶怕入丹青圖畫飛去了
無蹤此語更癡絕真有虎頭風

前調

范成大

細數十年事十處過中秋今年新夢忽到黃鶴舊山頭
老子箇中不淺此會天教重見今古一南樓星漢澹無

色玉鏡獨空浮
斂秦煙收楚霧熨江流
關河離合南北
依舊照清愁
想見姮娥冷眼應笑歸來霜鬢空敝黑
貂裘醺酒問蟾兔肯去伴滄洲

前調

燕山九日作

范成大

萬里漢家使雙節照清秋
舊京行徧中夜呼嘯濟黃流
寥落桑榆西北無限太行紫翠相伴過蘆溝
歲晚客多病風露冷貂裘
對重九須爛醉莫牽愁
黃花為我一笑不管鬢霜羞
袖裏天書咫尺眼底關河百二歌罷此

生浮惟有平安信隨鴈到南州

前調

陳三聘

玉鑑十分滿清露一年秋漂流蹤跡誰念楚尾與吳頭
此夜刮明塵眼望極好張詩膽何處有高樓浩蕩銀潢
冷縹緲白雲浮笑勞生難坎止亦乘流闌干拍碎清
夜起舞不勝愁萬里關河依舊一寸功名烏有清淚滴
衣裘老去心空在歸夢繞蘋洲

前調

舟過金山寺

張孝祥

江山自雄麗風露與高寒寄聲月姊借我寶鑑此中看
幽壑魚龍悲嘯倒影星辰搖動海氣夜漫漫擁起白銀
闕危駐紫金山表獨立飛玉佩整雲冠漱冰濯雪眇
視萬里一毫端回首三山何處聞道羣仙笑我邀我欲
俱還揮手從此去翳鳳更驂鸞

前調

張孝祥

樣棹太湖岸天與水相連垂虹亭上五年不到故依然
洗我征塵三斗快挹商飈千里鷗鷺亦翩翩身在水晶

闕真作馭風仙 望中秋無五日月還圓倚闌清唱孤
發驚起鰲龍眠欲酌鴟夷西子未辦當年功業空繫五
湖船不用知餘事鱸膾正甘鮮

前調

浮遠堂

仲并

靜練平千頃華棟俯中流凌晨畫戟來看宿雨斷虹收
八九胃中雲夢三千筆端風月無處快凝眸笑詠一堂
上揮塵氣橫秋 俯危闌紅日下暮雲收無窮偉觀祇
應天意為君謀容我時醒時醉獨泛微煙微雨浩蕩逐

輕鷗不羨岳陽勝丹碧聳層樓

前調

索去華

天下最奇處綠水照朱樓三高仙去白頭千古想風流
跨海晴虹垂飲極目滄波無際落日去漁舟蘋末西風
起橘柚洞庭秋記當年攜長劒覓封侯而今憔悴長
安客裏歎淹留回首洪崖西畔隨分生涯可老卒歲不
知愁做箇終焉計誰羨五湖遊

前調

送景文

李處全

上馬趨攜酒送客古朱方秋風斜日山際低草見牛羊
酩酊不知更漏但見橫江白露清映月如霜平睨廣寒
殿誰說路岐長醉還醒時起舞念吾鄉江山爾爾回
首千載幾興亡一笑書生事業誰道管城居士不換碧
油幢好在中冷水擊節奏伊涼

前調

秀州坐
上作

趙彥端

秋色忽如許風露皎如空平生青鬢餘地老與故人同
憶得鱸魚來後雜以洞庭新橘月墮酒杯中賓客可人

意歌舞轉春風 坐間玉花底月又從容從容更好無
奈多病已衰翁賴有主人風味識我少年狂態乞與酒
顏紅一醉曉鴉起流水任西東

前調

多景樓

陸游

江左占形勝最數古徐州連山如畫佳處縹渺著危樓
鼓角臨風悲壯烽火連空明滅往事憶孫劉千里曜戈
甲萬竈宿貔貅 露沾草風落木歲方秋使君宏放談
笑洗盡古今愁不見襄陽登覽磨滅遊人無數遺恨黯

難收叔子獨千載名與漢江流

前調

劉過

春事能幾許密葉著青梅日高花困海棠風急想都開
不惜春衣典盡只怕春光歸去片片點蒼苔能得幾時
好追賞莫徘徊雨飄紅風換翠苦相催人生行樂且
須痛飲莫辭杯坐則高談風月醉則恣眠芳草醒後亦
佳哉湖上新亭好何事不曾來

前調

呈趙總領

楊炎

買得一航月醉臥出長安平堤千里過盡楊柳綠陰間
依約曉鶯啼處認得南徐風物客夢恍驚殘重到舊遊
所如把畫圖看英雄事千古意一凭闌惜今老矣無
復健筆寫江山天上人間知己賴有使星郎宿照映此
塵寰準擬五湖去為乞釣魚竿

前調

楊炎

把酒對斜日無語問西風胭脂何事都做顏色染芙蓉
放眼暮江千頃中有離愁萬斛無處落征鴻天在闌干

角人倚醉醒中 千萬里江南北溯西東吾生如寄尚
想三徑菊花叢誰是中州豪傑借我五湖舟楫去作釣
魚翁故國且回首此意莫匆匆

前調

劉光祖

客夢一回醒三度碧梧秋仰看今夕天上河漢又西流
早晚涼風過鴈驚落空階一葉急雨鬧清溝歸計休令
暮宵露浥征裘 古來今生老病許多愁那堪更說無
限功業鏡中羞只有青山高致對此還論世事舉白與

君浮送我一杯酒誰起舞涼州

前調

題甘將軍廟卷雪樓

李泳

危樓雲雨上其下水浮天羣山四合飛動寒翠落檐前
盡是清秋闌檻一笑波翻濤怒雪陣卷蒼煙炎暑去無
跡清駛久翩翩夜將闌人欲靜月初圓素娥弄影光
射空際渺嬋娟不用濯纓垂釣喚取龍宮仙駕耕此萬
瓊田橫笛望中起吾意已超然

前調

次陸務觀登多景樓韻

毛升

襟帶大江左平望見三州鑿空遺跡千古奇勝米公樓
太守中朝耆舊別駕當今豪逸人物藐應劉此地一尊
酒歌笑擁貔貅 楚山曉淮月夜海天秋登臨無盡須
信詩眼不供愁恨我相望千里空想一時高唱零落幾
人收妙賞頻回首誰復繼風流

前調

對木樨小
飲次韻

韓 流

明月到花影把酒對青紅此情飄灑但覺清景滿簾櫳
人被好花相惱花亦知人幽韻佳處本同風揮手謝塵

網舉袂步蟾宮 秋已半幽澗側亂山中故人過我終
夕乘興可千鍾賴有曲江才子坐上平章花月不管老
英雄心事將何寄醉語別匆匆

前調

清明
嚴滌

韓 流

今古釣臺下行客繫扁舟扁舟何似雲山千疊亦東游
我欲停橈一醉與寫生平幽憤橫管更清謳小上客星
閣短鬚獨搔頭 風乍歛雲未起雨初收一年花事數
聲鷓鴣欲春休弔古懷賢情味只有浮名如故誰復識

羊裘賴得玄英隱相望此溪流

前調

韓 流

一枕暑風外事事且隨緣隨緣何處琴劍閒泊此層顛
日遶九天樓殿煙幕四山林薄塵土市聲前老眼醉還
醒猶得到詩邊 橋南院雙桂隱有名言江湖人物好
在收拾付書簾回首吾廬無恙寄臥僧牕何事鴻鵠本
高騫水調賦明月誰道更超然

前調

韓 流

新月已如許我問帶湖梅人間題句贏得浮漈酒盈杯
拓落豪英滿座爛漫風騷連紙天外鳳凰來只恐輕孤
負莫待巧安排空翠滴寒爽矣晚佳哉為君絕倒拆
盡千樹玉蓓開渺渺章泉好在寂寂盧家仙去今古付
尊罍拍手見花木放眼記莓苔

前調

次宋
倅韻

韓 澆

嘉節已吹帽誰復見南山南山佳處臺上雲繞一溪環
猶記使君同醉化鶴千年何在今古自應慳勝事漫陳

迹風物只高寒 都莫問歸酒畔集毫端等閒吟笑而
今賴有孔融尊偉矣廣平心致贏得相遭淡泊感舊唱
酬間且看小齋菊抵掌共憑闌

前調

汪莘

寄語山阿子何日出幽篁蘭衣蕙帶為我獨立萬尋岡
頭上青天蕩蕩足下白雲靄靄和氣自悠揚一陣東風
至靈雨過橫塘 招山鬼弔河伯俟東皇朱宮紫闕何
事宛在水中央長望龍輶雷駕憑仗簫鐘交鼓賓日出

扶桑我乃援北斗子亦射天狼

前調

簫酒得三十六壺醉黃山神

汪莘

釀秫小春月取酒雪花晨滿壺插破浮蟻湧起碧鱗鱗
誰覺東風密至更帶梅香潛入甕裏淨無塵一見酒之
面便得酒之心 這番酒未及飲未留賓黃山圖就舊
日境界喜重新三十六峰雲嶂三十六溪煙水三十六
壺春寄語黃山道我是境中人

前調

送吳叔永

吳潛

才惜季方去又更別元方驚心天下雙鳳接翅下高岡
萬里瞿塘煙浪一片昭亭雲月渺渺正相望夜雨連風
凝此意獨淒涼杜鵑聲猶不住攪離腸黃雞白酒吾
亦歸興動家鄉人事紛紛難料世事悠悠難說搔首對
穹蒼肯落兒曹淚一笑付滄浪

前調

題舫齋

李昉英

郭外足幽勝潮入漲溪流舫齋小小一葉老子日遨遊
管領白蘋紅蓼披戴綠蓑青箬直釣任沈浮玉縷飽魚

鱸雪陣狎河鷗 箇中眠箇中坐箇中謳箇中收拾詩
料觴客箇中留休羨垂槎博望且聽洞簫赤壁樂處是
瀛洲日月蕩雙槳天地一虛舟

前調

題登春臺

李昉英

野趣在城市崛起此臺高誰移蓬島馮夷夜半策靈鼇
十萬人家甃碧四面峰巒擁翠遠峙拍銀濤插漢筆雙
塢簸兩葉輕舸我乘風時一到共嬉遨江山無復偃
蹇彈壓有詩豪寶劒孤橫星動鐵笛一聲雲裂寒月水

宮袍滄海一杯酒世界渺鴻毛

前調

題蒲圻景星亭上慕容宰

盧炳

華亭新偉觀勝地得高雄凭闌徙倚杳渺萬里景無窮
好是江流縈繞那更雲天舒闊疊嶂倚晴空眼界無盡
藏懷抱有清風主人賢開綺席泛金鍾放懷一笑許
我滿酌醉顏紅祇恐璽書即下促起飛鳧東去行作黑
頭公還記今朝客曾對一杯同

前調

盧炳

風馭過姑射雲珮挹浮丘丁寧月姊為我澂霽一天秋
盡展冰匳玉鑑要看瑤臺銀闕萬里冷光浮分與世間
景好在水邊樓想霓裳呈妙舞起清謳藍橋何處試
尋玉杵恣追游擬待鉛霜擣就緩引瓊漿沈醉誰信是
良籌長嘯跨鯨背不必願封留

前調

石孝友

美人在何許相望正悠悠雲牕霧閣遙想宛在海中洲
空對殘雲冷雨何限重山疊水一夢到無由遺怨寫紅

葉薄倖記青樓 金烏擲玉蟾缺物華休鳳梧鴛竹一
夜風露各驚秋惟有遠山無賴淡掃一睂晴綠特地向
人愁歛袂且歸去回首漫遲留

前調

括聽真上人琴歌

林正大

耿耿銀潢淨牕月瑩如冰朱絲一扣萬籟不起冷光凝
千古遺音猶在一洗淫哇鄭衛北里與南陵孰識聲音
事哀樂不同情 咽流泉戛鳴玉擊浮金老龍啼曉幼
狻忽復暮山吟為我臨風再奏仙鵲翩翻十二感物一

何靈此曲誰當聽四海有知音

前調

括岳陽樓記

林正大

欲狀巴陵勝千古岳之陽洞庭在目遠銜山色俯長江
浩浩渾無涯際爽氣北通巫峽南去極瀟湘騷人與遷
客覽物興尤長錦鱗游汀蘭郁水鷗翔波瀾萬頃碧
色上下一天光皓月浮金千里把酒登樓對景喜極自
洋洋憂樂有誰會寵辱兩俱忘

前調

括黃州竹樓記

林正大

聽說竹樓好佳地占黃岡月波相接俯臨江瀨挹山光
急雨檐喧瀑布密雪瓴敲碎玉幽閨興尤長琴調更虛
暢詩韻轉清揚公退暇披鶴氅戴華陽手披周易消
磨世慮坐焚香縹緲煙雲竹樹迎送夕陽素月勝槩總
難量欲辦騷人事瀹茗漱清觴

前調

括廬
山高

林正大

廬山幾千仞屹立竝長江揚瀾左蠡洪濤巨浪日春撞
風止雲消水淨相與泊舟登岸攀磴望空磴巖壑響松

桂巨石激流淙 事幽尋遺世俗絕紛
庵幽花野草香
滿時有鶴飛雙
美子買田築室欲使浮嵐暖翠坐臥對
軒牕我欲為君說安得筆如扛

前調

葛長庚

江上春山遠山下暮雲長
相留相送時見雙燕語風檣
滿目飛花萬點回首故人千里把酒沃愁腸
回鴈峰前路煙樹正蒼蒼
漏聲殘燈焰短馬蹄香
浮雲飛絮一身將影向瀟湘
多少風前月下迤邐天涯海角魂夢亦

淒涼又是春將暮無語對斜陽

前調

詠百舌

吳子孝

落日青蕪岸移棹綠蘋洲清和天氣碧樹陰合暮雲稠
忽聽林間百舌巧作千般妙語嘔啞更咿嚶側耳行吟
畔如聽好歌喉車音細機韻杳櫓鳴柔誰家兒女昵
昵學語不能休乍止猶啼宛轉吹徵呵宮迭奏百鳥枉
啁啾翹首上林苑好共鳳凰遊

前調

賞牡丹

楊慎

春宵微雨後香徑牡丹時雕闌十二金刀誰翦兩三枝
六曲翠屏深掩一架銀箏緩送且醉碧霞卮輕寒香霧
重酒暈上來遲席上歡天涯恨雨中姿向人如訴欲
將彩筆記相思九十春光堪惜萬種心情難寫粉淚半
低垂曉看紅濕處千里夢佳期

前調

又一體
秋懷子由

蘇軾

明月幾時有把酒問青天不知天上宮闕今夕是何年
我欲乘風歸去又恐瓊樓玉宇高處不勝寒起舞弄清

影何似在人間
轉朱閣低綺戶照無眠不應有恨何
事長向別時圓人有悲歡離合月有陰晴圓缺此事古
難全但願人長久千里共嬋娟

前調

黃庭堅

瑤草一何碧春入武陵溪溪上落花無數枝上有黃鸝
我欲穿花尋路直入白雲深處浩氣展虹霓祇恐花深
裏紅露濕人衣坐白石敲玉枕拂金徽謫仙何處無
人伴我白螺杯我為靈芝仙草不為絳脣丹臉長嘯亦

何為醉舞下山去明月逐人歸

前調

題季修書室

呂渭老

秋齋多夢渴舌本欲生煙獨步一庭明月鴈字已橫天
作箇生涯不遂松竹雨荒三徑却憶五湖船小阮貧尤
甚犢鼻挂長竿白鷗汀風共水一生閒橫琴喚鶴要
攜妻子老雲間燈火熒熒深夜高臥南牕折几杯到不
留殘莫遣江湖手遮日向長安

前調

趙伯山席上見梅

向子諲

天公深藏巧雲裏放春回不到閒花凡草都付與疎梅
獨立水邊林下瀟灑冰容孤豔清瘦玉腰肢觸撥暗香
動風味欲愁誰 姮娥攜青女過夜闌時瑤冠瓊佩粲
然一笑亦何奇賸欲舉觴對飲不怕月明霜重寒氣著
人衣只恐鄰笛起化作玉塵飛

前調

別彭城

蔡伸

醉擊玉壺缺恨寫綠琴哀悠悠往事誰問離思渺難裁
綠野堂前桃李燕子樓中歌吹那忍首重回惟有舊時

月遠遠逐人來 小庭空清夜永獨徘徊
伴人幽怨一枝瀟灑隴頭梅
心斷雲帆西去目送煙波東注
千里接長淮為我將雙淚好過楚王臺

前調

中秋和施司諫

羅願

秋宇淨如水月鏡不安臺
鬱孤高處張樂語笑脫塵埃
檐外白毫千丈座上銀河萬斛
心境兩佳哉俯仰共清絕
底處著風雷 問天公邀月姊
媿凡才婆娑人世羞見蓬鬢
漾金壘來歲公歸何處照耀
彩衣簪橐禁直且

休催一曲庾江上千古繼韶咳

八聲甘州

一名甘州曲西域記載龜茲國工製伊州甘州涼州等曲皆翻入中國詞調八聲者歌時之節奏也
雙調九
十五字

八聲甘州

湯恢

摘青梅薦酒甚殘寒猶怯
芣羅衣正柳腴花瘦綠雲冉冉紅雪霏霏
隔屋秦箏依約誰品春詞回首繁華夢流水斜暉
寄隱孤山山下但一瓢飲水深掩苔扉
羨青

山有思白鶴忘機悵年華不禁搔首又天涯彈淚送春
歸銷魂遠千山啼鴉十里茶蘼

前調

又一體

蕭列

可憐生飄零到茶蘼依然舊銷魂殘春幾許風風雨雨
客裏又黃昏無奈一江煙霧腥浪捲河豚身世忽如葉
那自清渾莫厭悲歌笑語奈天涯有夢白髮無根怕
相思別後無字寫回文更月明洲渚杜鵑聲裏立向臨
分三生石情緣千里風月柴門

鳳凰臺上憶吹簫

取列仙傳秦弄玉
事雙調九十五字

鳳凰臺上憶吹簫

宋媛
李清照

香冷金猊被翻紅浪起來慵自梳頭任寶匳塵滿日上
簾鉤生怕離懷別苦多少事欲說還休新來瘦非干酒
病不是悲秋 休休這回去也千萬徧陽關也則難留
念武陵人遠煙鎖秦樓惟有樓前流水應念我終日凝
眸凝眸處從今又添一段新愁

前調

轉官
毬

趙文

白玉搓成香羅捻就為誰特地團團美司花神女有此
清閒疑是弓韉蹴鞠剛剛踢誤掛花間方信道酴醾失
色玉蘂無顏 凭闌幾回澹月怪天上冰輪移下塵寰
奈堪同玉手難插雲鬢人道轉官毬也春去也欲轉何
官聊寄與詩人案頭冰雪相看

前調

沈野雲
吹簫

張翥

琪樹鏘鳴春冰碎落玉盤珠瀉還停漸一絲風嫋悠颺

清冥疑把紅牙趁節想有人記豆銀屏何須教琵琶漢
女錦瑟湘靈追思舊時勝賞醉幾度西湖山館池亭
慣倚歌花月按舞娉婷歲晚相逢客裏且一尊同慰漂
零君休惜吳音朔調盡與吹聽

前調

秋夜

馬洪

澹澹秋容澄澄夜影娟娟月挂梧桐愛簫聲縹緲簾影
玲瓏彩鳳銜書未至玉宇淨香霧空濛涼如水翠苔凝
露琪樹吟風匆匆年華暗換嗟舊歡成夢彷彿飛蓬

想清江泛鷁紫陌遊驄應念佳期虛負瞻素彩感慨相
同凝情久誰家搗練砧杵丁東

天香

又一體雙調
九十五字

天香

王觀

霜瓦鴛鴦風簾翡翠今年較是寒早矮釘明牕側開朱
戶斷莫亂教人到重陰未解雲共雪商量未了青帳垂
氈要密紅鑪圍炭宜小呵梅弄妝試巧繡羅衣瑞雲

芝草伴我語時同語笑時同笑已被金尊勸酒又唱新
詞故相惱盡道窮冬元來恁好

玉女迎春慢

雙調九

十五字

玉女迎春慢

彭元遜

纔入新年逢人日拂拂澹煙無雨葉底妖禽自語小啄
幽香還吐東風辛苦便怕有踏青人誤清明寒食消得
渡江黃翠千縷看臨小帖宜春填輕暈濕碧花生霧

為說釵頭裊裊繫著輕盈不住問郎留否似昨夜教成
鸚鵡走馬章臺憶得畫眉歸去

傾杯樂

又一體雙調
九十五字

傾杯樂

柳永

離讌慙慙蘭舟凝滯看看送行南浦情知道世人難使
皓月長圓彩雲鎮聚算人生悲莫悲于輕別最苦正歡
娛便分鴛侶淚滴瓊臉梨花一枝春帶雨慘黛別臨

行猶自再三問道君須去頻耳畔低語知多少他日深
盟平生丹素從此盡把憑鱗羽

夢揚州

雙調九
十五字

夢揚州

秦觀

晚雲收正柳塘煙雨初休燕子未歸側側輕寒如秋小
欄外東風軟透繡幃花密香稠江南遠人何處鷓鴣啼
破春愁長記曾陪燕遊酬妙舞清歌麗錦纏頭殢酒

困花十載因誰淹留醉鞭拂面歸來晚望翠樓簾捲金
鈎佳會阻離情正亂頻夢揚州

尾犯

又一體雙調
九十五字

尾犯

柳永

夜雨滴空堦孤館夢回情緒蕭索一片閒愁想丹青難
貌秋漸老蛩聲正苦夜將闌燈花漸落最無端處忍把
良宵只恁孤眠却佳人應怪我自別後寡信輕諾記

得當時翦香雲為約甚時向幽閨深處按新詞流霞共
酌再同歡笑肯把金玉珍珠博

白雪

又一體雙調
九十五字

白雪

雪

楊无咎

檐收雨脚雲乍斂依舊又滿長空紋蠟焰低熏鑪燼冷
寒衾擁盡重重隔簾櫳聽撩亂撲瀉春蟲曉來見玉樓
珠殿恍若在蟾宮長愛越水泛舟藍闕立馬畫圖中

悵望幾多詩意無句可形容誰與問已經三白忒是報
年豐未應真箇情多老却天公

雙瑞蓮

雙調九十五字
與雙頭蓮無涉

雙瑞蓮

雙頭蓮

趙以夫

千機雲錦裏看竝蒂新房駢頭芳蕊清標豔態兩兩翠
裳霞袂似是商量心事倚綠蓋無言相對天蘸水彩舟
過處鴛鴦驚起
縹緲漾影搖香想劉阮風流雙仙姝

麗閒情未斷猶戀人間歡會莫待西風吹老薦玉醴碧
筒揀醉清露底月照一襟歸思

慶清朝慢

雙調九

十五字

慶清朝慢

文徵明

天朗氣清惠風和暢勝遊何似山陰春光自來堪戀一
刻千金蘭舟初泛畫橋春水一篙深煙霏處離離淺草
冉冉遙岑且此傍花隨柳柳陰繫馬花外轉幽禽擾

擾蜂黏柳絮蝶繞花心為問朱衣車馬何如我白髮園
林新月上竹枝風動環珮清音

塞姑

又一體雙調
九十五字

塞姑

柳永

一聲雞又報殘更歇秣馬巾車催發草草主人燈下別
山路險新霜滑瑤珂響起栖烏金鐙冷敲殘月漸西風
緊襟袖淒裂 遙拍白玉京望斷黃金闕遠道何時行

徹算得佳人凝恨切應念念歸時節相見了執柔荑嘉
會處沾香雪免鴛衾兩恁虛設

小聖樂

雙調九十五字元好問製蓮花
曲以授歌者亦名驟雨打新荷

小聖樂

元好問

綠葉陰濃偏池亭水閣偏趁涼多海榴初綻朵朵感紅
羅乳燕雛鶯弄語對高柳鳴蟬相和驟雨過似瓊珠亂
撒打偏新荷 人生百年有幾念良辰美景休放虛過

富貧前定何用苦張羅
命友邀賓宴賞飲芳醕淺斟低
歌且酩酊從教二輪來往如梭

芭蕉雨

雙調九

十五字

芭蕉雨

梅

晏壁

角聲高吹夢斷月痕尚挂林梢
萬葉千花似埽綠避紅
逃讓與寒梅獨殿還狀元宰相
當消恁了却殘年教人
媿煞離騷
富貴等鴻毛紛紛傷春濃李天桃
自是冰

魂欲解漫倩井刀只道乾坤清氣怎知他雪虐風饕睡
起望北斗闌干人間翠羽嘈嘈

玉梅香慢

雙調九
十五字

玉梅香慢

本意

無名氏

寒色猶高春力尚怯微律先催梅拆曉日輕烘清風頻
觸疑散數枝殘雪嫩英如粉嗟素豔有蜂蝶全似人人
向我依然頓成離缺徘徊寸腸萬結又因知暗成凝

咽撚蕊憐香不禁恨深難絕若是芳心解語應共把此
情細細說淚滿闌干無言強折

徵招

又一體雙調
九十五字

徵招

雪

趙以夫

玉壺凍裂琅玕折駸駸逼人衣袂暖絮漲空飛失前山
橫翠欲低還又起似妝點滿園春意記憶當時剡中情
味一溪雲水天際絕人行高吟處依稀灞橋鄰里更

翦翦梅花落雲階月砌化工真解事強勾引老來詩思
楚天暮驛使不來悵曲闌獨倚

前調

九日有懷
楊守齋

周密

江蘼搖落江楓冷霜空鴈程初到萬景正悲秋奈曲終
人杳登臨嗟老矣問今古清愁多少一夢東園十年心
事恍然驚覺腸斷紫霞深知音遠寂寂怨琴淒調短
髮已無多怕西風吹帽黃花空自好問誰識對花懷抱
楚山遠九辨難招更曉煙殘照

前調

聽素伯
長琴

張炎

秋風吹碎江南樹石牀自聽流水別鶴不歸來引悲風
千里餘音猶在耳有誰識醉翁深意去國情懷草枯沙
遠尚鳴山鬼客裏可消憂人間世寥寥幾年無此杏
老古壇荒把淒涼空拍心塵聊更洗傍何處竹邊松底
共良夜白月紛紛領一天清氣

前調

答仇山
村寄

張炎

可憐張緒門前柳相看頓非年少三徑已荒涼更如今

懷抱薄遊渾未減滿煙水東風殘照古調誰彈古音誰
賞歲華空老京洛淙縑塵悠悠意獨對南山一笑只
在此山中甚相逢不早瘦吟心共苦知幾度翦燈牕小
何時更聽雨巴山賦草池春曉

聲聲慢

宋蔣捷賦秋聲俱用聲字收韻調名
本此雙調九十五字聲作勝者誤

聲聲慢

周密

燕泥沾粉魚浪吹香芳堤十里新晴靜惹游絲花邊梟

梟扶春多憐漂泊記章臺曾挽青青堪愛處是撲簾嬌
嫩隨馬輕盈長是河橋三月做一番晴雪惱亂詩魂
帶雨沾衣羅襟點點離痕休綴潘郎鬢影怕綠牕年少
人驚卷春去翦東風千縷碎雲

璫瓏四犯


雙調九
十五字

璫瓏四犯

劉基

白露點珠明河生浪秋光看一半翠衾知夜永夢冷孤

館南樓數聲過鴈西池桂花零亂歲序如何江山若此
贏得霜鬢滿傷心慢回愁眼見蛩吟蔓草螢度荒墻
淚隨黃葉下事逐浮雲散滄波滾滾東流去問誰是登
樓王粲菊綻籬邊賦歸來恐晚



御選歷代詩餘卷五十九